

八旗則例




八旗則例

戶口

一編審丁冊

國初定。各旗人丁。三年編審一次。○又定。旗員子弟。俟十八歲。登記部冊後。方許分居。如未及歲。擅自分居者。議罰。○順治十七年題準。凡官員子弟。有職任者。不拘定限歲數。準其分戶。○康熙八年題準。凡調補管別佐領者。止準帶本家壯丁。若將兄弟族中壯丁帶往者。皆令按人數償還。○二十四年議準。旗人家產。原在一佐領



者。後雖分撥別旗。仍令親族承受。不論旗分。四十七年奉

旨。嗣後八旗佐領轉調戶口之事。悉令奏明。○雍正四年覆準。八旗壯丁。自雍正元年編審後。已屆三年。傳知八旗都統。

盛京。江寧等省住居滿洲。蒙古漢軍將軍都統副都統。各交與該佐領。驍騎校。領催等。將新舊壯丁。逐戶編審。造具清冊。並將編審之各佐領。驍騎校。領催姓名保結。開送戶部。其未成丁。及非正身。另戶之子弟。并應開除人丁。各該都統。驗

實開除。其滿洲。蒙古。漢軍。戶下額丁。皆令開清花名。附載冊內。送部。至烏喇捕牲人丁。戶部委旗員筆帖式。前往編審。若將未成丁。及非正身之子弟。假冒入冊。或將應入冊。及不應開除之壯丁。隱匿開除。在京將各該旗都統。在外將各該將軍。都統。副都統。以至領催。均行治罪。○五年覆準。八旗人丁。三年編審一次。凡身及五尺者。皆入冊。病故者開除。各佐領造戶口清冊二本。一咨戶部。一貯該旗。其戶口冊內。開載一戶正戶某人。繫官。開明某官某人。無官者。開載開

散某人。上書父兄官職名氏。旁書子弟。及兄弟之子。並戶下人丁若干。其各省駐防官兵。以及外任文武各官。子弟家屬。皆令戶部行文。各該將軍督撫。照此造冊咨送。俟各處冊籍到齊。各該旗附入各佐領冊內。鈐印報部存案。以後三年編審。均照此辦理。○七年覆準。八旗正身壯丁。每逢編審之年。無論在京在屯。年滿十五。該管官細加察驗。務無假冒。方準入冊。應裁者。亦必詳勘。聲明緣由。注冊送部。至八旗漢軍勲舊佐領下。若無正身。可選驍騎兵丁之人。即在戶

下拔用。年滿十五。亦令該管官。逐名編審注冊。以備拔補。○八年奏準。各省駐防將軍。都統。副都統等。將所屬官兵壯丁數目。察明具奏。不拘在京旗分佐領。止據彼處壯丁數目。均齊。繫四旗駐防。於四旗內均齊。繫八旗駐防。於八旗內均齊。別造清冊備覈。其簡選官員。拔補領催。驍騎。即在均齊之旗分。選拔在京之原旗分佐領。仍照舊注冊。遇比丁之年。咨送各該旗報部。或五年。十年。滋生人丁。又至多寡不齊。再奏請均齊。○十三年議準。八旗正身壯丁。或寓親友。或

流落鄉屯。向未入冊。補入本旗丁冊內。勒限六月首報。其從前潛住

盛京多年者。即入於

盛京冊內。約束當差。若不呈明該旗。潛匿私往別處者。照逃人例治罪。該管叅佐領。並不形地方官察拏。照例議處。若從前並未居住

盛京。潛匿他省者。勒令一年內自首。押令歸旗。免其治罪。○又定。凡八旗在京官員兵丁。閑散別住戶下人等。均令該佐領。給與印票。開明各年貌家口。以備街道步軍尉察驗。其在鄉屯之候

選。革職官員。閑散別住戶下人等。每戶給與執照。開明年貌住址生業。以備地方官察驗。各佐領所給印票。先送該叅領。編號鈐用關防。每於歲底封印後。呈送都統。貯庫備考。○乾隆元年。覆準。駐防休致。革退官員。因一時路費不敷。本身先行歸旗者。其妻子家口。限一年內回京。如逾限未回。即令其子在該處充兵。造入丁冊。不得於當差數年之後。又請歸旗。至寡婦家口。從前在彼處。倚子弟充兵度日。京中充兵居官之子弟。呈請接取寡婦情願回京者。準將寡婦接

取養贍。其兄弟等家口。不得一同歸旗。再八旗官兵。如年五十。並無子嗣。在京在外。又無的屬承祧。呈請將親兄弟之子孫調回者。準其調回。又駐防兵丁。內從前撥往時。原有父母兄弟在京。後因年久戶絕。無人祭掃。呈請回京承祀墳墓者。行文該旗察明京中果繫絕嗣。準令一丁帶領家口。歸旗承祀。○又奏準。附入京城當差之察哈爾護軍驍騎人等所遺之闕。行令察哈爾旗分選補。其戶口。於察哈爾地方丁冊內開除。造入京城冊內。遇該佐領護軍校驍騎校員

闕。與該佐領人等。一同簡選。其子孫造入京城丁冊。三年

諭前次自軍營撤回開戶之領催驍騎內。一等二等。均著為正戶。別載冊籍。和通和爾翰烏遜珠兒等處。打仗陣亡開戶之領催驍騎。轉不能與彼一例。伊等為國効力陣亡。實屬可憫。著交與八旗。將此等陣亡開戶之領催驍騎等子孫察明。亦著為正戶。與別載冊籍之人。照例選拔驍騎。欽此。○又奏準。附入各旗之投誠新舊厄魯特回子等。於丁冊內。別行注明。其子孫與佐領下正身蒙古一

體送補護軍校驍騎校及執事人役○四年覆
準八旗遇比丁之年將年至十八歲以上者覈
明入冊分注正戶開戶之下填載三代履歷其
戶下人之祖父繫何出身均於本名下注明良
家子弟均作正戶分造鈐蓋印冊二分一貯該
旗一咨戶部至各省駐防人員及外任旗員戶
口凡遇比丁之年亦照此辦理○六年議準八
旗編丁有以身及五尺造入丁冊者有年至十
八造入丁冊者事不畫一今酌定身及五尺皆
造入丁冊以杜規避隱漏之弊其從前造入丁

冊之人已故者固宜開除如有逃亡賣出者編
審之年亦應聲明裁除如將應入冊之壯丁隱
瞞不行造入或將未成丁幼童編入丁冊者覈
叅交部議處○又議準編審丁冊如將不應入
冊之幼丁編入丁冊或將應入冊之壯丁遺漏
者該佐領等官例有處分但旗下教養兵例於
鰥寡孤獨之家拔取如因繫幼丁不準入冊則
業經關領錢糧之人丁冊尚屬無名今酌議已
食錢糧之人不論年歲大小一并造入丁冊以
昭畫一○八年奏準

陵寢總管并禮部等處所屬旗人。遇比丁之年。造具丁冊。咨報該部。該旗察覈。○十一年奏準。附入察哈爾旗之喀爾喀。於比丁之年。與察哈爾一例。將丁冊造報各該旗。其入冊之人。遇有牛羊牧羣。護軍領催。牧丁闕。準其補用。一分晰戶丁。

國初定八旗戶。下壯丁。首先登城者。準其開戶。並將胞兄弟。適伯叔帶出。仍償給原主身價銀。順治八年定。原在

盛京編審正戶。有告稱繫伊奴僕者。不準歸并本

繫戶籍內人。有告稱非伊家奴僕者。亦不準出戶。○九年議準。

內府三旗佐領內管領下官員。有軍功勞績。奉

特旨令其開出內府佐領內管領者。各歸上三旗旗下佐領。五旗王公府屬。有滿洲佐領。有旗鼓佐領管領。原與旗下佐領有間。旗鼓佐領下人。尤不得濫廁漢軍之例。但繫

盛京帶來。自內府分出。已經編入冊籍者。均準其與旗人一體考試選官。其於本王公府屬。曾經効力。本王公準其開出管領下者。止許移於府

屬佐領。惟著有軍功勞績。或奉

特旨。或由王公奏準。令其開出府屬佐領者。各歸本
王公所屬旗下佐領。或歸上三旗旗下佐領。其
父兄子弟開散者。準其帶出。見有職任者。不準
帶出。○雍正二年覆準。八旗開戶義子人等。不
得越佐領認戶。仍留在本佐領下當差。如有越
佐領認戶。自稱正戶。與原主無涉者。該旗都統
即拏交該部。從重治罪。○三年議準。旗下奴僕
或借別旗名色買贖。或自行贖身。旗民冊籍均
無姓氏者。察出。即令歸旗。具有隨主出差外任

私有蓄積。鑽營勢力。欺壓本主贖身者。雖在民
籍。究明欺壓是實。亦令歸旗。若果繫數輩出力
之人。本主念其勤勞。情願聽其贖身為民。旗部
有案可稽。州縣有籍可據為民者。仍歸民籍。舊
主子孫。不得借端控告。○七年

諭。佐領下滿洲少者。恐廢佐領。將戶下滿洲。及家生子
開戶人。載入正戶滿洲冊內。令充前鋒護軍者。其情
尚可原宥。倘佐領下滿洲本多。佐領知而作弊。或將
養為子嗣之漢人。載入滿洲冊內。令補前鋒護軍理
宜治罪。再八旗見今開戶人。及養子補前鋒護軍者。

甚多。若輩即與滿洲等矣。其中亦有人去得漢仗好効力行間。得歷官階者。或佐領等懼罪不報。伊等又恐黜退。隱忍不首。必且令刁惡之人。致生訛詐控告等事。著交八旗大臣等。將朕此旨曉諭各該佐領。有將開戶及養子。拔為前鋒護軍者。各將緣由報明。其開戶及養子。亦令從實自首。並不革退。伊等之前鋒護軍。如有人去得。行走好者。有應升之處。亦許列名。既經開戶。即繫正戶。惟別載冊籍。俾得明晰。可免日後控告之端。倘於此時。隱忍不吐實情。日後察出。或被旁人首告。從重治罪。欽此。○十二年奏準。八旗開

戶養子人等。已補前鋒護軍領催者。遵

旨首出。別載冊籍。其子弟及從前察覈之時。未得前鋒護軍領催。已造入正戶冊內之開戶養子。亦應令各該旗。再加察覈。分晰族支。注明何人之子孫。每佐領下造冊二本。鈐印。一存貯該旗。一咨送戶部備案。將總數交直月旗彙奏。此後如復有黃緣入正戶冊內者。除治罪外。仍載入開戶養子冊內。其選拔前鋒護軍及賞給

恩卹銀。均照原奏之例遵行。如別載冊籍人內。有軍前行走出眾者。該旗大臣。預將緣由奏明引

見補授官職。如遇比丁之年。有應增裁之處。亦如丁冊。一律編造。○十三年奏準。八旗有民人冒入旗籍者。照過繼民人爲嗣例。入於別載冊籍內。嗣後永不許民人冒入旗籍。違者除本人治罪外。保報之該管官。一并交部議處。○又議準。數年以來。奉天來京歸旗居住者。並不呈明該管大員。止告知佐領等官者甚多。伊等身繫甲兵。不向該管大員告假而來。或在彼處妄行不法。不能度日。希圖僥倖來京。亦未可定。嗣後如有來京歸旗居住者。令其呈報該將軍。聲明緣由。

用印文咨送來京。該旗覈實。應令居住者。奏明令其居住。○乾隆三年議準。

盛京帶來奴僕。原屬滿洲蒙古。直省本無籍貫。帶地投充人等。雖有籍貫。年遠難以稽察。均準開戶。不得放出爲民。乾隆元年以前白契所買。作爲印契之人。在本主佐領下。選補步軍。俟三輩後。著有勞績。本主情願放出爲民者。具呈本旗。咨報戶部。覈明祖父姓名籍貫。準其爲民。仍行文該地方官注册。止許耕作謀生。不準考試。乾隆元年以後白契所買之人。未入丁冊者。準其

贖身爲民。○四年議準。

國初俘獲之人。年分已遠。與投充之人。迷失籍貫者。無別。至遠年印契所買奴僕內。有

盛京帶來。及帶地投充之人。原繫旗人。轉相售賣。雖有籍貫。無從稽考。均應開戶。不準爲民。此內有實繫民人。印契內尚有籍貫可稽者。照乾隆元年以前白契所買家人例。効力過三輩後。準其爲民。○又議準。絕戶家人。本主尚有同族人等。即編入族人戶下。無族人可歸。不論家下陳人。契買奴僕。均準於本佐領下開戶。責令看守。

伊主墳墓。年力精壯者。準於本佐領下選拔步軍。如內有乾隆元年以後白契所買之人。情願贖身爲民者。準其贖身。身價照絕戶財產入官例辦理。○又議準。八旗戶下家人開戶。向由各該旗聲明。本主念其世代出力。情願準其開戶者。該叅佐領族長族人。列名具保。咨部。無論何項人等。詳察上次丁冊有名。並冊內注繫陳人者。即準開戶。至旗下家奴。放出爲民。向由本主念其數輩出力。勤勞年久。情願放出爲民。呈本旗咨部轉行地方官。收入民籍爲民。今既將

盛京帶來奴僕及帶地投充人等。並乾隆元年以前乾隆元年以後白契所買之人。分別定例。應行各旗將奴僕之祖父籍貫於一年限內。令各主據實開報。畫押。叅佐領覈實。呈都統送部。凡遇比丁之年。即照此次造冊。於編審內注明。遇有開戶爲民之案。以便稽考。至各省旗人。俟文到日。亦於一年限內。造冊送旗。該旗覈明。送戶部覆覈。又議準。乾隆元年以前放出爲民之戶。有未經呈報旗部者。該旗察出。如果數輩出力。其主情願放出。編入民籍。地方官有冊可據。

者準其爲民。如繫借名設法贖身。私入民籍者。其主既得身價。應令歸旗。作爲開戶。其放出爲民。未入民籍。及入籍在乾隆元年以後之戶。亦令歸旗。作爲開戶。再設法贖身之戶。或繫自備身價。或親戚代爲贖身者。均應歸原主佐領下。作爲開戶。若繫實在用價買出。隨又交價贖身者。均應歸買主佐領下。作爲開戶。如繫開戶壯丁。用價買出者。買主原非正戶。正身。其名下不應復有開戶之人。應仍歸原主佐領下。作爲開戶。又議準。旗下家奴。將民人之子抱養。既經

繼與家人爲嗣。即與家人無異。應造入伊主戶下。以便稽察。○又議準。八旗正戶。從前撫養。并隨母改嫁適人。或跟隨外任。或在鄉居住。未及呈報。因未造入丁冊。或因丁冊無名。不準自首者。總屬戶口不清之人。未便任其脫漏。令各旗察明。分晰彙奏。別行注冊。如有正戶人之子。其母改嫁於正戶人。或嫁於戶下家人。情願隨母撫養者。將本人造入生父本宗冊內。若民間子弟。自幼隨母改嫁於正戶旗人者。照戶口不清例。別行注冊。至戶下家人之子。隨母嫁於正戶。

以及民間之子。隨母改嫁與戶下家人者。統以戶下造報。嗣後遇有隨母改嫁人等。叅佐領即時確察。呈報都統存案。仍於編審之年。注明丁冊。咨戶部察覈。○又議準。從前正戶旗人之子。自幼給與旗民正身。及戶下家人撫養。呈請歸宗者。該旗察實。取具兩姓族長族人保結。並該叅佐領印結。送戶部存案。準其歸宗。○又議準。八旗造報丁冊內。有向開正戶一戶。後經造爲開戶人等。或繫隨母改嫁。或寄入親屬戶內。原繫別立一戶。迨後被人欺壓。造入戶下。作爲開

戶原非戶下家人可比。準其呈旗察明，果有被人欺壓情弊，分晰具奏，咨部更正。至從前造入戶下，後經造為開戶，並向來造為開戶人等，若果繫正身，當時即應呈明更正。何至數十年之後，待子孫分別，此等停其更正，以杜冒濫。○六年奏準：八旗內無論從前投充及乾隆元年以前契買家奴，果繫竈戶，察明祖父姓名籍貫確有証據，該管官出具印結詳報，行文提解。始準放出歸竈。如有指稱竈丁抗違家主者，照例治罪給主。○七年定：王公之子孫開散宗室，亦有

分與佐領者，此等人原繫正身，如不能養贍，交本旗都統備補驍騎，或交進上三旗

內府存於公中，不得鬻與旗下官員，以良為賤。至王公宗室自買旗下家奴，原繫戶下，亦不得竄入正戶冊內，以賤為良。○又定籍没人丁，凡繫旗人戶下者，均令旗人領買，不得作為正戶。及聽其贖身為民。○十二年奏準定例：乾隆元年以前放出為民之戶，果繫伊主情願放出，入籍年久者，準其為民。如乾隆元年以後始入民籍，繫伊主念其勤勞情願放出者，令歸旗作為伊

主名下開戶是念其勤勞願放爲民之僕尚入原主戶下今借名設法贖身私入民籍者反入於佐領下作爲開戶似屬輕重不均除從前已經議結之案外嗣後或經首告或被察出其報明旗部伊主得過身價者令歸原主名下作爲開戶若未經報明旗部者無論伊主曾否得受身價均令歸旗仍作原主名下家奴不準歸入佐領下作爲開戶二十一年

諭八旗別載冊籍之人原繫開戶家奴冒入正戶後經自首及旗人抱養民人爲子者至開戶家奴均

繫旗人世僕因効力年久其主願令出戶見在各旗及外省駐防內似此者頗多凡遇一應差使先盡正戶正身簡選之後方將伊等選補欲自行謀生則又身隸旗籍不能自由見今八旗戶口日繁與其拘於成例致生計日益艱窘不若聽從其便俾得各自爲謀著加恩將見今在京八旗在外駐防內別載冊籍及養子開戶人等均準其出旗爲民其情願入籍何處各聽其便所有本省田產並許其帶往此番辦理後隔數年似此舉行一次之處候朕酌量降旨此內不食錢糧者即令出旗其

食錢糧之人。若一時遽行出旗。於生計不無拮据。如何定以年限裁汰出旗。交與該部會同八旗都統詳悉定議具奏。欽此。遵

旨議準。八旗別載冊籍。養子開戶人等。既

恩準爲民。凡在京文武官署任者。不準實授。見任者。遇旗員有關。停其升補。如期屆應升。應調。俟漢官有關。作何升調。交吏兵二部定議。外任文武官。即令改歸民籍。所借各項官銀。仍坐扣完結。不準復借。其中病故。革退者。原有應追應免之項。但既準出旗爲民。若復追欠項。難免紛擾。應

一例豁免。見在進士舉人。生員。繙譯進士舉人。生員。以及捐納之人。需次待用者。讀書子弟。應試者。如何收考錄用。交吏禮兵等部辦理。閑散之人。令各該旗。詢明情願入籍何處。徑咨該地方官。收入民籍。造冊咨戶部存案。至見食錢糧者。如願退糧爲民。亦準一例辦理。其見在當差者。停其調選。俟闕裁汰。遇有婚喪等事。優卹銀。停其支給。仍將姓名造冊咨部備考。借過庫銀。照常坐扣完結。不得找借。病故者。本身未完庫銀。照例豁免。其願退糧爲民。并革退兵丁。未完

庫銀。以及代扣庫銀。既令爲民。無錢糧可抵。亦應一例豁免。○又別載冊籍人內。有具呈告退。見食半俸半餉。全俸全餉者。亦有陣亡人。父母妻室。賞給半俸半餉者。仍準支給。以養餘年。俟身後裁汰。至孀婦期年。半俸半餉。毋庸支給。養贍孀婦之教養兵。亦停其技補。直省駐防官兵。閑散內。別載冊籍。養子開戶人等。亦應照此辦理。令該將軍。都統等。就近詢明。願入何省民籍。造冊送旗存貯。仍咨報戶部。轉行該地方官。收入民籍。○又別載冊籍人等。典買地畝。及老圈

地畝欽遵

恩旨。令其照常管業。如有典賣者。照例令其典賣與旗人。永不準與漢人私相授受。至見在官兵人等。認買官地官房。未經坐扣完結。遇病故革退。以及辭糧出旗。如願交見銀。準其交納。無銀交納。將房地繳回戶部。其扣過俸餉。將所得租息扣除。餘銀給還。○又開戶人內。有設法贖身。經戶部作爲公中開戶者。若準一例爲民。誠恐漫無區別。或交內務府莊頭名下。作爲壯丁。或準其爲民。應詳察根源。會同戶部。分別請

旨。○又正紅。鑲紅。鑲藍等旗漢軍佐領下。多繫內務府撥出別載冊籍之人。裁汰後。該佐領處。並無應補之人。請將見食錢糧者。分撥該旗各佐領處。額外當差食餉。所存正戶。俟有關。準其頂補。其餘別載冊籍之人。有關。陸續裁汰。至此等佐領驍騎校。仍令在旗當差。如繫正戶。以旗員對品坐補。如繫別載冊籍。俟屆應升之期。交部辦理。○又

諭。見因八旗戶口日繁。已降旨將別載冊籍及養子開戶人內。察其未食錢糧者。各令出旗。自行謀生。

外。其見食錢糧者。如何定限裁汰出旗。著該部會同都統等議奏。至宗室王公等。府屬戶口。有因其効力年久。據該王公等。咨請撥附旗下佐領者。見今八旗別載冊籍及養子開戶者。悉經察明辦理。其宗室王公等。府屬戶口。如仍舊準其撥附。則旗人衆多。不能遽得錢糧。生計未免艱窘。彼此均無裨益。嗣後宗室王公等。府屬戶口。撥附旗下佐領之處。著停止。再宗室王公等。府屬戶口。滋生日繁。該王公等養贍。亦恐拮据。著該宗室王公會同各該旗都統等。將各府屬戶口。亦著察明辦理一次。

此次辦理之後。隔數年。似此辦理之處。候朕酌量降旨。庶此項人等。均得自謀生理。該王公都統等。即遵旨辦理。欽此。

一閱選秀女。順治年間定。八旗滿洲。蒙古。漢軍。官員。正戶軍兵。開散壯丁秀女。每三年一次。由戶部行文八旗二十四都統。直隸各省。八旗駐防。及外任旗員。將應閱女子年歲。由叅領。佐領。驍騎校。領催。及族長。逐一具結。呈報都統。彙咨戶部。戶部奏準日期。行文到旗。各具清冊。委叅領。佐領。驍騎校。領催。族長。及本人父母。或親伯

叔。父母兄弟。兄弟之妻。送至

神武門。依序列。候戶部交內監引

閱。有記名者。再行選閱。不記名者。聽本家自行聘嫁。如有事故。不及與選者。下次補行送閱。未經閱看女子。及記名女子。私相聘嫁者。自都統。叅。佐。領。及本人父母。族長。皆分別議處。有殘疾不堪入選者。由族長。領催。驍騎校。佐領。具結。呈報都統。聲明緣由。咨戶部奏

聞。康熙年間定。閱看秀女時。有繫

后族近支。及母族繫宗室。覺羅之女者。均聲明。雍

正五年奉

旨。八旗秀女閱看畢。將記名數目。請旨再行閱看。其八旗記名。三品以下官員之女。每月賞銀一兩。如記名過五年。退出名者。著加恩賞銀二十兩。在五年內退出名者。即停其每月賞銀。乾隆三年奏準。選秀女時。該佐領等。取具族長確實保結。叅佐領等。再加詳察。如有隱瞞。別經發覺。隱瞞之人。繫官草職。繫平人。交刑部治罪。族長及該管官。領催等。分別知情不知情。議處治罪。當選時。如遺漏未會傳知。繫佐領。驍騎校。領催。遺漏。將佐領。驍騎

校。議處。領催。鞭責。族長。家長。免議。若族長遺漏。繫官。議處。兵丁。鞭責。不行詳察之佐領。驍騎校。議處。領催。鞭責。家長。免議。其在屯之秀女。該佐領。驍騎校。差領催。前往稽察。如有隱瞞。遺漏等弊。將差往之領催。照在京族長例。議處。其京城之族長。及該管官。除知情扶同隱瞞。及遺漏不行傳知。仍與京城一例處分。外。草率具結之在京族長。該佐領。驍騎校。比照京城例。減一等處分。此等隱瞞。遺漏情由。如該管官。事後察出。首報。將該族長。家長。照例處分。該管官。減二等議

處。族長、家長於事後首出。將族長、家長及該管官減二等議處。其有頭面肢體殘病之女。令家長同族長報明該管官。送都統等驗明報部。違者家長、族長繫官議處。兵丁鞭責。該管各官免議。事後自首者。家長減一等處分。族長免議。○五年奉

旨。三年一次閱看秀女時。有事故遲誤。及下次閱看。又有事故。則候至數年。有誤婚嫁。嗣後閱看秀女時。遇有事故。不及閱看之秀女。年未及歲。尚可候者。著候下次閱看。若十八歲以上。至二十歲閱看時。

又遲誤不及閱看者。著該旗都統覈明遲誤緣由。具奏或補行閱看。或聽其適人。別降諭旨。欽此。○又議準。八旗秀女例。應三年一次。戶部請

旨。閱選移咨八旗造冊送部。照內府選秀女之例。俟選後再行聘嫁。遇有事故。不得與選。俟下次閱選。其未經閱選者。雖至二十餘歲。亦不準私行聘嫁。有違例不待閱選。即行聘嫁者。該旗都統察叅。照例治罪。○六年奉

旨。嗣後閱看秀女。無論大小職官及兵丁。每女子各賞車價銀一兩。今歲看過者。皆著補給。著動用戶

部廣儲司庫銀。○八年奉

旨。選秀女時。外任旗員之女。若概令送京閱看。路途遙遠。不免往返跋涉之勞。嗣後外任文官同知以下。武官游擊以下之女。停其送閱。○十一年奏準。選秀女時。由京師補授各省將軍都統。副都統之女。從前既經赴京閱看者。仍令其送閱外。至各省駐防協領等官之女。從前並未會赴京者。仍無庸送閱。○十二年奉

旨。應閱秀女。於未閱之前。私與宗室王公結姻者。將母家照隱瞞秀女例議處。或雖經王等奏請。而母

家未曾許字者。免議。

一漢軍改歸民籍。乾隆七年

諭。八旗漢軍。自從龍定鼎以來。國家休養生息。戶口日繁。其出仕當差者。原有俸餉。足資養贍。第閑散人多。生計未免窘迫。又因限於成例。外任人員。既不能置產別居。而閑散人。即有外任親友可依。及手藝工作。可以別去營生者。皆為定例所拘。不得前往。以致袖手坐食。困守一隅。深堪軫念。朕思漢軍。其初本繫漢人。有從龍入關者。有定鼎後投誠入旗者。亦有緣罪入旗。與夫三藩戶下。歸入內務

府王公府屬撥出者。以及招募之礙手。過繼之異姓。並隨母因親等類。先後歸旗。情節不一。其中惟從龍人員子孫。皆繫舊有功勳。閱世既久。自無庸再議更張。其餘各項人等。或有廬墓產業在籍者。或有族黨姻屬在他省者。朕意欲稍為變通。以廣其謀生之路。如有願改回原籍者。準其與該處民人一例編入保甲。有不願改入原籍。而外省可以居住者。不拘道路遠近。準其前往入籍居住。其有原籍並無倚賴。外省亦難寄居。不願出旗。仍舊當差者。聽之。所有願改歸民籍。與願移居外省者。無

論京外官兵閑散。皆限一年內。呈明本管官具奏。如此屏當。原為漢軍人等。生齒日繁。籌久遠安全之計。出自特恩。後不為例。此朕格外施仁。原情體卹之意。並非逐伊等使之出旗為民。亦非國家糧餉有所不給。可令八旗漢軍都統等。詳細曉諭。仍詢問伊等。有無情願之處具奏。欽此。○八年諭。朕前因八旗漢軍。戶口日繁。生計未免窘迫。又限於成例。不能出外營生。特降諭旨。除從龍人員子孫。無庸更張外。其餘各項入旗人等。有願改歸民籍。與願移居外省者。準呈明本管官具奏。原指未

經出仕。及微末之員而言。至於服官既久。世受國恩之人。在伊等本身。及子弟。自不應呈請改籍。而朕亦不忍令其出旗。此後文官自同知等官以上。武官自守備等官以上。均不必改歸民籍。欽此。

十二年

諭。朕因八旗漢軍人等。生聚日繁。家計未裕。於乾隆七年。特降諭旨。自從龍人員子孫外。願改歸民籍。移居外省者。準其呈明本管官具奏。旋據漢軍都統等。分晰辦理。允行在案。朕觀漢軍人等。或祖父曾經外任。置立房產。或有親族在外。依倚資生。及

以手藝潛往直隸各省居住者。頗自不少。而按之。功令。究屬違例。伊等潛居於外。於心亦自不安。朕思與其違例潛居。孰若聽從其便。亦可各自謀生。嗣後八旗漢軍人等。願在外省居住者。在京報明該旗。在外。呈明督撫。不拘遠近。任其隨便散處。該督撫咨明該旗。每年彙奏一次。以便稽察。務令安靜營生。無得強橫生事。如此。則於功令不相妨礙。伊等亦得安居樂業。生計有資矣。欽此。○十四年議準。漢軍情願在外省居住者。在京報明該旗。轉咨戶部。戶部分咨各省。其在外呈明督撫者。

亦一面咨明該旗。一面咨報戶部。仍於每年歲底。各省造冊。送戶部彙總奏

聞。

一旗人撫養嗣子。

國初定。無嗣人。撫養他人之子。許報明本主。貝勒。該旗都統。送部注册。增入本佐領壯丁數內。若私自撫養者。斷歸本宗。順治十八年題準。凡無嗣人。存日。撫養兄弟族人之子。準承受家產。其撫養他人。及奴僕之子。不準承受。若存日未曾立嗣。身故後。準近房承受。如本族無人。存日

保結撫養異姓之子。亦準承受。若無族人。又無撫養異姓人。照絕戶家產辦理。康熙七年覆準。凡撫養他人子為嗣。歿後。其子本生父母年老乏嗣。準仍令歸宗。又題準。凡無嗣人家產。除親兄弟承受外。若叔伯及兄弟之子承受。有親生女者。給家產三分之一。疎族人承受。其女給家產五分之一。至撫養異姓之人承受。及應歸佐領撥給者。其女均給家產之半。如數少難分。及有分撥餘剩者。均給承受之人。凡分給女子。無論人數。止於應給分內分撥。雍正十二

年議準。無嗣人。請立異姓親屬為嗣者。務令該旗取兩姓情願甘結。并各該管叅佐領及族長保結。送部存案。以杜占奪財產之端。如無兩姓甘結。不準入繼。○乾隆四年議準。八旗無嗣人。如有同宗及遠近族人。昭穆相當。可繼為嗣者。該旗叅佐領呈報都統。咨部準繼為嗣。不得過繼異姓。以亂宗支。若無同宗可繼。除戶下家奴。民間子弟。雖與正戶旗人分屬至親。不準承繼外。其有正戶親屬。情願過繼者。取具兩姓族長。并該叅佐領印甘各結。咨部準其繼立。倘

實有同宗可繼。詐稱並無族人。湏繼異姓者。按律治罪。

一旗人買賣奴僕。

國初定。旗下買賣人口。赴各該旗市交易。若越至他旗市被執者。身價二分入官。一分給拏獲之人。○又定。滿洲壯丁。越旗賣出。被首者。身價二分入官。一分給首告之人。買主無罪。該管佐領知情者治罪。壯丁撤回。撥給本旗。不知情者。壯丁撤回。撥給本佐領下貧人。○又定。有將人父子兄弟。夫婦分賣者。所賣之人。均入官。○順治

元年定。凡旗下漢人。有父母兄弟妻子。情願入籍同居者。地方官給文。赴戶部入冊。不許帶田地投獻。○二年題準。近京地方。管莊人等。強壓愚民。及工匠。勒令投充者。在內。許赴戶部。五城御史。順天府。在外。赴道府州縣告理。審實。令歸原籍。○又題準。有假借投充。冒名奴僕。涵託廝養。或悍奴欺壓故主。部民凌厲本官。及慢侮縉紳。傾陷富室。占騙人口財物者。事發。治以重罪。○三年題準。自次年為始。漢人投充旗下。永行禁止。○五年覆準。投充人。即繫奴僕。願賣者聽。

○又覆準。俘獲人口。有將其父子。兄弟夫婦分賣者。仍令給還完聚。賣主鞭責。○七年題準。投充人。置買民間房地者。房地并價銀入官。買賣兩造。從重治罪。○八年

諭。投充人。有生事擾民者。本主及該佐領。如知情。皆連坐。前此有司。因責懲旗人。曾經問罪。以致投充人。益加橫肆。嗣後地方官。遇投充人有犯。與屬民一例究治。欽此。○九年題準。陣獲人口。準其贖回。令家屬領歸。○十年題準。八旗買賣人口。均令該領催注冊。以備稽察。民人令親鄰中證立契。赴本管衙

門挂號鈐印。即免輸稅。如不注册。無印契者。即治以私買私賣之罪。○十七年題準。投充人。誣稱不繫投充者。審出。鞭一百。如果不繫投充。欺壓良民者。亦鞭一百。○又題準。有將正戶人。告稱繫伊奴僕者。鞭八十。其投充人。先未在地。方納糧。後將房地納糧。輒稱不繫投充者。審明。枷一月。鞭一百。地方官。溷報者。以抗違論。其民人住種旗人房地。年久。告稱繫自己房地者。杖八十。○又覆準。各莊屯。均設領催。責成稽察。如旗人有指稱投充。欺壓百姓者。解部究審。若繫假

冒。地方官依律究擬。○十八年覆準。旗下赴市買人。注册時。該翼察明。給以印照。○康熙二年。題準。八旗買賣人口。兩家赴市。納稅注册。令領催保結。列名。繫漢人。令五城司坊官。驗有該管官印票準買。○八年

諭。差遣官員。並督撫提鎮。大小各官。不許買良民為奴。及轉相餽送。永行禁飭。違者。照畧賣良民例治罪。欽此。○又題準。旗人買民為僕。令本管官用印。若隔屬官用印。照解良民例議處。所買之人。釋放為民。買者賣者。各責懲有差。○又議準。有將

定例後所買之人。捏作定例前年月用印者。事發用印官及買者。賣者。皆加等治罪。○十五年題準。旗人買民。令正印官用印準買。若在地方犯罪。逃出賣身者。保人繫民。枷三月。杖一百。繫旗人。枷三月。鞭一百。原價追還給主。賣身人遞解本地方官。枷三月。杖一百。仍照所犯罪。依律究治。其旗人說稱民人賣身者。枷三月。鞭一百。保人繫旗人。枷三月。鞭一百。繫民。杖一百。流徙尚陽堡。若繫逃人。照常鞭刺。○又定。賣身假控籍貫姓名。不從實開寫者。枷兩月。鞭一百。仍斷

與買主。保人繫民。枷一月。杖一百。旗人。枷一月。鞭一百。○十八年題準。凡旗人買僕。由用印衙門呈部。轉行督撫。令地方官曉諭里甲。如用印官。十日內。不將買人緣由報部者。罰俸一年。竟不報者。降一級。○二十一年題準。直省駐防各官。及提鎮以下等官。概不許買本省之民。違者。降二級調用。若縱令家人買者。照本官買人例議處。該管官失察者。降一級留任。其駐防兵丁。量許買人。令賣身人親至地方官處。取具親供存案。契內書情願字樣。用印鈐蓋。若未經取親

供文契雖有情願字樣。實繫勒買者。買主枷一月。鞭一百。若本官囑兵丁買者。照本官買人例議處。如本主在京。家人當兵在外駐防者。準買。其在外駐防官之家人當兵者。不準買。○二十二年議準。滿洲蒙古家人。違禁賣與漢軍漢人者。買賣之人。繫官。罰俸一年。繫旗人。鞭一百。民杖一百。如佐領。內管領。驍騎校。及收稅官。知情者。罰俸九月。領催。鞭八十。所買之人。并價。皆入官。其喀爾喀。厄魯特。人。亦不許漢軍漢人買用。違者。官降一級調用。旗人。鞭一百。民杖一百。所買之人。入官。○二十六年。

諭。駐防滿洲漢軍將軍以下。官員兵丁。本省買人。如有不容行詢原籍。勒令地方官用印者。著該督撫指名題參。嚴加議處。欽此。○三十年題準。出征所獲之人。

有親戚情願來旗完聚者。不得作為奴僕。有願回本籍者。聽。○三十九年題準。鹽竈戶賣身旗下者。事發後。將賣身人枷三月。杖一百。回原籍著役。保人枷兩月。杖一百。仍行文該地方官。追取身價。交還原主。如不能償。著保人代償。○五十二年議準。白契所買之人。若在買主家長。大。年久當為父子。可以當差者。令充步軍。○雍正。

元年覆準。白契賣身之人。經買主配與妻室者。不準贖身。若未經賣身之先。或已定親。未曾完娶。賣身旗下。女家並不知情者。必問明女家情願。方許配合。如女家不情願者。聽其別嫁。○三年覆準。八旗滿洲。蒙古家下開戶人等。間有懶惰。不能度日。串通原主。賣身他家。賣後日久。又稱滿洲。肆行勒索。一經發覺。將原主一并議罪。并將冊籍撤回。給後買之人為奴。○四年覆準。船廠有民人願入旗為奴者。照京師例。報知該地方官。給與印文。準其買賣。○六年

諭。外省駐防兵丁。常買地方民人為僕。此內多有匪類。往往自恃旗人。生事不法。朕知甚悉。既為兵丁。理應隨時隨地。勤苦習勞。方能日漸壯勇。豈可忘其職分。所在多置使令之人。以求便安之理。兵丁所恃以為生者。惟在糧餉。僕役既多。所費衣食亦廣。一人所得糧餉。何能養養多人。計兵丁僕役。男婦不過數人。已足多買人口。徒費產業。何益之有。且果繫良民。豈肯入旗為奴。其入旗為奴者。或在地方被事。欲圖報復。或賭博飲酒。懶惰無賴。不務本業。貧難度日。聊圖餬口。或繫大盜。懼捕。或為人命逃避。希圖藏身。此等之

人。兵丁何能得其力乎。况將犯法爲盜之人。買爲奴僕。一經發覺。必貽累已身。此皆兵丁愚昧無知。貪圖價賤。妄思多得奴僕。曾不計其豢養之艱難。罪譴之株連也。應將奴僕中善良者。量留足用。其餘匪類。或索原價放出。或賣與無僕之人。庶幾易於豢養。既可得力。又不至罪譴株連。著行文各省將軍副都統通行曉諭。嚴禁兵丁收買民人爲僕。嗣後如有違旨之人。著該將軍參處。如隱匿不奏。著地方大員密奏。倘地方大員亦通同徇隱。經他處發覺。將該管官及地方大員。一并從重治罪。欽此。○十二年議準。捕牲壯

丁人等。解送貂皮來京。置買旗下奴僕者。令管轄前往之總管副管佐領驍騎校領催等。并賣主之佐領驍騎校領催等。各具保結。在於左右兩翼稅契。其典買民人者。令總管等報明大宛二縣。將典賣僕人姓名籍貫注册。若黑龍江官兵來京置買旗下奴僕者。取具同往官員保結。呈明本旗都統注册。照例稅契。典買民人亦照例報明大宛二縣注册。違者。僕人斷回。買主照溷買例治罪。管轄官參處。若將所買之人。三年內得重價轉賣與人者。照畧賣人口律治罪。該

管各官。以失察例議處。○乾隆四年題準。奉天買賣人口。令兩造該管官。驗明文契。鈐蓋印信。關防。準其注册。○五年奏準。駐防各官。不許收買民人爲僕。違者。照例議處。若官員縱令家人私買。及囑託兵丁買者。亦照本官買人例議處。該管官據實揭報。將軍等察出叅處者。皆免議。駐防兵丁。實在並無家人者。具呈該管官覈實。出具保結。許其買人。不過二名。仍令賣身之人。親至地方官處。取其親供存案。立契用印。書情願字樣。如勒買。及見有家人。捏稱無家人。多買

人爲僕者。兵丁治罪。出結之。該管官。及不能察出之將軍等。皆照例議處。

一旗人逃亡。定例投遞逃牌。在京者。限五日。二百里以內。限十日。四百里以內。限十五日。將逃自何處。及日期。姓名。年貌。服色。并初次。二次。三次。有無攜帶軍器。詳悉聲明。咨刑部緝拏。○又定。八旗正戶。及家人逃走。自行投回者。該旗將逃走次數。月日多寡。及在外有無爲匪。分晰咨明刑部。其逃繫初次。一年以內投回。二次。六月以內投回。三次。三月以內投回。年十五歲以下。

十歲以上。皆免治罪。無庸送部。於文內聲明。勾銷逃牌。此外應治罪之犯。該旗將人文。並送刑部。○乾隆八年奏準。外省駐防兵丁逃走。除咨報刑部外。即開明逃人年貌。知照在京本旗。及沿途有駐防兵丁地方。并附近省分。一例嚴拏。分別次數治罪。其窩藏之家。及失察各官。皆照例治罪。○又奏準。兵丁內有因病狂逸。自行投回者。亦有為事牽累。或債負深重。借端逃走。年久投回者。其事不一。嗣後選拔護軍驍騎時。令該佐領等確實出保。同閑散壯丁。一例酌量。

貧富拔取。若借端逃走。日久投回人內。生計艱難者。先補步軍。令其効力。如無過犯。行走勤慎。仍照常選護軍驍騎。至補護軍校驍騎校時。均不得列名。○九年奏準。旗人逃出。斷不潛住京城附近之處。應行令直隸總督。八溝熱河副都統。

盛京等處將軍。蒙古扎薩克等。差委官兵。務將此等汗邪逸出。借端逃走。及失迷被誘之旗人。嚴加訪拏。即解交刑部審訊。若實因病狂逸出。失迷被誘者。應準選補差事。令其効力。若繫借端

逃出者即照逃人例治罪。交該叅領嚴加約束。再旗人生計仰仗錢糧。若永遠不令食錢糧。實屬艱難。俟過一年。如果改悔。該叅領出具保結。咨送步軍統領。拔取步軍。如果行走勤慎。俟三年後。該統領咨送各該旗。選補護軍驍騎。十年議準。八旗正戶兵壯。如果繫瘋狂汗邪。該管各官理宜預為管束。迺漫無覺察。及至逃走。又捏為具報。殊非管束旗人之道。嗣後除十五歲以下之幼丁。被人拐失。或迷失路徑者。仍照例通行尋獲外。其八旗所報瘋狂逸出。汗邪失迷。

之人。如一年內不能拏獲。各該都統等。於年終將逸失人數。開明具奏。交刑部覈明。會同兵部。照駐防旗下家人脫逃例。按名數分別議處。至兵壯內。實繫逃走。而該族長等。謊報患病發狂。該佐領等。不確實察明。即為轉報。及逃走之人。在駐防旗員所屬。與文職所屬地方。存留居住者。皆按例議處。再八旗印契白契。所買家奴。本主並未得力。竟爾拐帶財物潛逃。雖呈報刑部通緝。向有明例。然法久漸弛。以致惡奴更名易姓。托人轉售。應通行順天府。五城。并各該處地

方。嚴行察拏。○又奏準。駐防兵丁。初次逃走。于
一年內自行投回免罪者。該駐防處。往往以該
犯兵闕。業經別行拔補。彼處無產業可倚。咨報
留京。是伊等轉得以逃走為留京之計。嗣後仍
發回原處酌量令其當差。不準留京。

